

Lo bo a  
spièrta mi.com

Si bo tabata sa ku  
mi ta den gran peliger  
sin ku mi sa?

## Kua ta e peliger anto?

### 1. Beibel ta pronostiká e temporada ku nos ta biba aden i loke ta bai pasa den detaye.

Un gran parti di Beibel ta profesia. Profesia ta loke Dios ta konta ku ta bai pasa den futuro. Loke ku ta pasando den mundu awor ta kana presis riba e skema ku nos ta lesa den Beibel tokante esaki. Tin hopi profesia den Beibel ku ya a wòrdu kumplí. Tin sierto profesionan ku a sosodé asina presis i literal ku nan kier bisa ku ta despues el a wòrdu skirbí. Pero esaki ta demostrá muchu mas ku e Dios di Beibel ta omnisiente, E sa tur kos. Tin profesionan den Beibel ku no a sali ainda. Mi kier konta mas di nan, lo bo bai ripará den e añanan ku ta bini si e kos aki ta konfiabel si o nò.

### 2. Kiko ta biniendo? E 7 añanan di tribulashon

Beibel ta deskribí e tempu ku nos ta bibando aki komo e último tempu. Esei ta un periodo kaminda amor di hende ta fria i hende ta konsentrá riba nan mes. Hopi hende lo wòrdu engaÑA fásilmente, lo tin hopi guera, i rumornan di guera, hamber, malesanan contagioso, terremoto, desasternan natural masha straño, persekushon i libertinahe.

Beibel ta deskribí e último 7 añanan di mundu komo e temporada di mas horibel ku a yega di eksistí riba mundu.

Lo bai tin un hende ku lo reina riba mundu, lo tin un sistema di pago mundial kompletamente kontrolá, personanan ku no ta partisipá na e sistema aki no por kumpra ni bende mas. Lo bai tin desasternan horibel i 90% di e poblashon mundial lo muri.

### 3. Kiko mi tin ku hasi pa mi por skapa di e 7 añanan horibel aki?

Tur hende ku ta kere den Señor Hesu-Kristu i ku ta konfia riba djE (yamá “e iglesia di Kristu” den Beibel) lo keda di spar for di e tempu pisá aki. Promé ku e 7 añanan aki Señor Hesus lo tuma su iglesia bai kuné den shelu. Esaki ta wòrdu yamá raptu. Diripiente miyones di kristian lo desaparecé. Esaki lo trese un káos i un pánico grandi, i kisas lo tin spekulashon ku ta ekstraterestre a bai ku e hendenan. Kua splikashon ku nan bini kuné den e tempu ei, no kere! Ta mentira.

Tin solamente un manera pa por skapa di e opreshon aki na mundu. Un manera pa bo no tin nodi di pasa den e huisio eterno di Dios pa bo pikánan i pa bo ta felis pa semper. Lesa mas tokante esaki bou di “Kon mi por wòrdu salvá”.

### 4. Kon mi por sa si punto 1/3 ta kuadra?

E manera mas bisto pa bo por

haña sa ta ora ku bo ripará ku masha hopi hende a disparsé for di mundu. I ora bo mira despues ku loke Beibel ta bisa tokante e shete añanan aki ta sosodiendo. Mi no tin e espektativa ku hopi hende lo kere mi den prinsipio, pero hustamente pasobra e desaparishon diripiente di asina tantu hende lo ta asina bisto, mi ta kere ku e ora ei si lo bo ta habrí pa loke mi ta bisa. Beibel ta bisa tambe ku hopi hende lo yega na fe den e shete añanan aki.

### 5. Kiko awor si mi haña sa ku loke bo ta skirbi ta bèrdat te despues di e raptu?

Lo bo no por skapa mas di e tempu pisá aki. Pero bo por kombertí na Dios i pone bo konfiansa den Su yu Kristu Hesus. Asina bo por wòrdu salvá pa eternidat. E ta zona duru, pero Beibel ta papia tokante fièrnu, kaminda hende lo keda pa eternidat si nan no kere den Dios i shelu, e lugá kaminda e hendenan ku a aseptá Hesus komo nan salvador lo ta felis pa semper.

Mi kier rogá bo pa bo kombertí i bira kara pa Dios, pasobra mundu lo ta kompletamente diferente despues di raptu. Lo bai ta hopi mas difísil ku awor pa haña e bèrdat. Esaki ta un asunto hopi serio, pidi pordon pa bo pikánan awe, kere den Hesus i siguiÉ.

## 6. E peliger di mas grandi no ta sintá den mañan, pero den awe!

Bo a wòrdu spièrtá pa un tempu horibel ku lo bai bin. Pero tin menasa di un peliger hopi mas grandi. Bo tabata sa ku kada 24 ora mas ku 160.000 hende ta muri? Beibel ta siña ku nos ta

wòrdu huzgá despues di morto. E ora ei nos tin ku para dilanti di un Dios santu i hustu i E ta huzga nos segun su kriterio, no segun nos kriterio i p'esei E lo mester deklará nos culpabel.

Pasobra Dios ta stima hende asina tantu, ku El a manda

Su yu Kristu Hesus na mundu pa E paga pa piká pa medio di Su sufrimentu. E kier karga bo kastigu i E ta ofresé bo pordon i bida eterno, pero solamente si bo aseptá Su oferta. Bo por lesa mas tokante esaki bou di “Kon mi por wòrdu salbá”.

## Kon mi por wòrdu salbá?

### Rekonosé ku bo ta un pekadòr.

Bo ta un bon hende? Kasi sigur bo lo kontestá ku “si” i bo no ta komprondé pakiko lo bo mester wòrdu salbá. Bo bon obranan no por kita bo kosnan malu ku bo ta hasi. Un hues hustu no por laga un asesino bai liber pasobra e ta un bon tata. Dios a pone su leinan den nos kurason i den nos konsenshi. Manera: no gaña, no hòrta, no uza Dios su nòmber sin tin mester, no kòrta orea (ni den pensamentu). Ora bo sa ku bo por hasi algu bon anto bo ta keda sin hasié tambe ta piká. Kuantu biaha kaba bo no a kibra e mandamentunan aki? Si bo mira bo mes awor segun e standart perfekto di Dios lo bo yama bo mes un bon hende ainda? Ami, lamentablemente ku nò.

Pero Dios ta amor, E no por laga e ko'i pasá? Si, Dios ta amor, pero E ta santu i hustu, 100% hustu. Dios Su mandamentunan no ta pa huzga bo. Pero pa laga bo mira ku bo ta culpabel i ku bo mester di un Salbador ku por karga bo pikánan

### Pidi pordon pa bo pikánan i tuma Hesus komo bo Salbador.

Si un hues ta sera su wowonan pa inhustisia, e ta korupto i e mes lo mester wòrdu kastigá. Dios ta totalmente santu i hustu i p'esei E no por laga niun piká sin kastigu. Dor ku nos no ta sin piká, E lo mester huzga nos tambe. Den Beibel ta pará ku e konsekuensia di piká ta morto. Pero Dios Su amor pa nos ta asina grandi ku El a manda Su propio yu na mundu pa karga e kastigu pa nos, pa medio di Su sufrimentu i Su morto na e krus.

Dios ta pidi solamente pa kere den Su yu pa por wòrdu salbá di e kastigu ku nos ta meresé. Den Juan 3:16 ta pará: “Pasobra Dios a stima mundu asina tantu, ku El a duna Su Yu unigénito, pa ken ku kere den djE no bai pèrdí, ma tin bida eterno”

Si bo duna bo bida na Señor Hesus, Spiritu Santu ku ta wòrdu yamá tambe e Konsolador lo bin biba den bo. E ta konvensé nos di piká i ta laga nos mira e kaminda

ku ta hiba na Hesus. E ta guia bo i duna bo forsa pa perseverá den sirkunstansianan difísil.

### Bira lomba pa piká, siña konosé Dios pa medio di Beibel i konfia riba djE.

Bo por siña konosé Dios dor di lesa Beibel i papia ku Dios mes pa medio di orashon, E kier un relashon ku bo. Beibel ta bisa nos tambe ku fe sin bon obra ta un fe morto. E bon obranan ta bini dor di gratitut i amor, e ta bai di mes ora bo eksperensiá Dios Su amor.

Bo ta bira un yu di Dios, si bo aseptá Señor Hesus komo bo Salbador. Esei no kiermen ku bida lo bai bira mas fásil, pero E lo ta huntu ku bo ku Su poder, pas i amor. A kousa di esaki lo bo bira lomba pa bo piká i biba pa medio di Su amor. Un pas i un amor ku no ta di e mundu aki i ku bo no por splika. Bo por eksperensié solamente dor di duna bo bida na Kristu. E ora ei E lo sigui guia bo den bida. E lo ta semper ku bo i E lo no bandoná bo.

# Seis argumento ku ta mustra konfiabilidadat di Beibel

## Tokante historia di Beibel

Tin masha hopi manuskrito bieu di Beibel. Di Plato tin solamente shete kopia. E di promé ta datá 1200 aña despues di su morto. Tòg niun hende no ta duda ku ta di Plato e ta. Tin 5.700 manuskrito di tètstamènt nobo di kua esun di mas bieu ta datá 40 aña despues di Hesus Su morto. Estudionan ta mostra ku e teksto a kambia masha tiki (<1%) durante añanan, di moda ku e kambionan no ta mustra di ta relevante (ortografia, sekuensia di palabra). Si e Tètstamènt Nobo no ta konfiabel, e ora ei ningun teksto históriko no ta konfiabel.

Arkeológonan a haña e ròlnan di Laman Morto, den nan diferente ròl di buki di kua algun ta datá te ku 200 aña promé ku Kristu. E buki di Beibel Isaias a ser haña kasi kompleto i idéntiko na loke nos konosé, loke ta mustra ku e teksto no a kambia dor di kopia. E ròl di Isaias a wòrdu investigá na Universidat di Reino na Groningen (Hulanda) intensivamente, meskos ku tur otro buki ta wòrdu investigá.

## Kumplimentu di profesia

E lista di profesia den Beibel ku ya a wòrdu kumplí ta masha largu mes. Mi ta bai pone mi enfoke awor riba esunnan ku bo mes por kontrolá si nan a kumpli kaba.

Den Ezekiel 36 i 37 ta wòrdu papiá tokante restourashon di e nashon Israel. Pa 1800 aña e nòmber Israel a dispersé for di tera. Den historia nunca a yega di sosodé ku un pueblo desterá ta haña un propio tera bèk, manera a pasa ku Israel na 1948. Un profesia ku no a kumpli ainda ta esun di Joel 3:2, kaminda ta pará ku e pais lo wòrdu dividí. Regularmente bo ta tende den notisia tokante e solushon di dos

estado. Si nan sigui ku e kos aki, e profesia aki tambe lo ta kumplí.

Profetanen di Dios a profetisá tokante kaida di hopi pais, manera Ammon, Moab, Filistea i tambe siudatnan manera Babilonia (e siudat aki lo wòrdu rekonstruí atrobe durante e último tempunan), Ninive, Tirus i Sidon. Ningun di e siudatnan aki no ta eksistí mas awendia. Den Beibel ta pará skirbí ku lo bini un momento ku lo bo no por kumpra ni bende si bo no tin un marka riba bo man drechi o riba bo frenta. E kos aki a wòrdu pronostiká 2000 aña pasá, un tempu ku hende no por a imahiná ta kon lo por a realisá esaki. Awendia ya nos por mira kaba ku hende por paga ku su man. Bo por imahiná bo ku si bo no aseptá sierto kondishonnan, nan ta blòkia bo kuenta di banco pues bo lo no por kumpra ni bende.

Un muestra hopi kla di eksistencia di Hesus ta ku kalendario ta basá riba Su nasementu. Si E no tabata E hende ku E ta bisa ku E ta, pues si E tabata un gañadó, e ora ei nan lo no a basa e kalendario riba Su nasementu tòg? Nos tur konosé e dianan di fiesta: Pasku, Bièrnè Santu, Pasku di resurekshon, Asenshon, Pentekòste, tur ta dianan ku ta pará pa akontesimentunan hopi importante den e bida di Hesus. Tur e momentonan aki ta wòrdu predisí den detaye den tètstamènt bieu.

## Ya kaba hopi trempan den Beibel bo ta haña deskubrimientunan sientífiko

Bo tabata sa ku na mas o ménos 1840 Semmelweis a wòrdu chèrchá pasobra el a preskribí protokòl nobo pa higiena, manera

laba man promé ku un parto? Despues a bin resultá ku hopi bida a wòrdu salvá dor di esaki i awendia ta mas ku lògiko ku ta hasi esaki. Míles di aña pasá Beibel a preskribí yen di lei di higiena pa e pueblo di Israel di moda ku nan espektativa di bida tabata mas ku dòbel mas haltu ku e pueblonan rondó di nan.

Beibel ta konta ku tin vaye den laman, promé ku hende por a sambuyá asina profundo o skèn (Salmo 18:15: e vayenan di laman a bira visibel). Henter e sirkulashon di awa ta wòrdu deskribí, loke ku hende por a demostrá hopi mas despues (Predikador 1:6,7). E buki “Siensia moderno den Beibel” ta yen di siensia ku tabata hopi adelantá pa su tempu, for di kua ta mustra e inteligensia i e sabiduria di e Kreador.

## Beibel no ta pinta kos mas bunita ku e ta

Beibel ta deskribí e komportashon no mucho positivo di e disípulonan, pero tambe e humiliashon di Hesus. Mi no por pensa ningun motibu pa pinta nan asina negativo, ku no ta ku ta esei ta e bèrdat. Ta kustumber di hende pa laga kos negativo afó si bo kier “bende” algu i pone énfasis riba loke ta positivo. Algun ehèmpel ta:

- E disípulonan ta hui na momento ku nan ta kue Hesus prezu.
- Hesus Su famia ta deklaré loko (Marko 3:21)
- Un multitut grandi ta haña Hesus Su palabranan duru na un dado momento i nan ta bai (Huan 6:66)
- E krusifikashon, loke ta un humiliashon grandi pa e lider di un movimentu spiritual.
- E disípulonan ta muri pa e Evangelio.

## Resistencia

Bo tabata sa ku na e momento aki tin 359 miyon di kristian ku ta wòrdu persiguí kruelmente pasobra nan ta kere den e Dios di Beibel? Si bo konosé Beibel anto lo bo sa ku e kontrinkante di mas grandi di Dios ta e diabel, ku ta hasi todo por todo pa por kaba ku kristianismo i pa pinta Dios pretu. Hesus mes ta bisa esaki kaba, E ta bisa: ‘Un

esklabu no ta mas ku su shon.’ Si nan a pèrsiguíMi, boso tambe nan lo pèrsiguí’ (JUA 15:20)

## Bidanán ta kambia

Ounke ku bo no ta wòri ku e pruebanan pafó di Beibel, bo por opservá e pruebanan interno di un bida kambiá. Hende ta kambia ora nan aseptá Hesus komo nan Salbador! Esaki ta

prueba ku Dios ta hasi loke ku E ta primintí den Su palabra i ku esun ku ta kere den djE a bira un kreashon nobo dor di fe. Si bo kier mira kon Dios ta kambia hende su bida, wak e programa ‘De Verandering’ di EO.

“Pesei, si un hende ta den Cristo, ta un kriatura nobo e ta; e kosnan bieu a pasa kaba; ata, tur kos a bira nobo” (2KO 5:17)

# E liña di tempu di e 7 aña di Tribulashon

## E temporada di awor

E Último tempu ta wòrdu reparti den diferente fase. Promé lo bai tin oumento di guera, teremoto, hamber, malesanan kontagioso, lo tin señalnan masha partikular den shelu, i hendenan lo ta masha yen di nan mes. Tambe ta pará skirbí den Beibel ku Damasko lo wòrdu destruí den un dia. Nos ta mira ku diariamente tin bataya na Damasko, ku armanan nuklear e destrukshon den 1 dia aki no ta imposibel. Beibel ta nombra diferente pais ku lo hunga un papel den e último tempu, manera Rusia, China i Iran.

## E rapto di e hendenan ku ta kere den Kristu (e iglesia)

Dor ku e mayoria di humanidat a bira lomba pa Dios i e kana di piká a yena, ta bini shete aña di huisio di Dios. Promé ku e tempu aki yega, Dios ta tuma e hendenan ku a kere den djE den shelu, pasobra El a bisa ku Su rabia lo no baha riba e iglesia. Promé lo tin e resurekshon di esnan ku a kere den Kristu, e hendenan aki lo wòrdu tumá den shelu huntu ku e kristiannan ku ta na mundu e momento ei. Pues e ora ei miyones di hende lo dispersé. Kasi sigur e media lo bisa ku ta ekstraterestre a sequestrá nan. Awendia bo ta skucha mas i mas den notisia tokante ufo i ekstraterestre di moda ku esaki lo ta un bon kos ku nan por uza pa splika e desaparishon aki.

## E 7 añanan di Tribulashon.

Un lider mundial lo lanta den e promé tres aña i mei for di un époka di 10 rei/reino. Tres di e diesnan aki lo kai i e shete otro rei/reinonan lo entregá nan poder na e lider mundial aki, Beibel ta yamé e anti Kristu. E lo sera un pakto ku Israel i trasladá su gobièrno pa Israel. Un tèmpel nobo tambe lo wòrdu edifiká. E lider mundial, e anti-kristu lo laga mira su kara berdadero despues di tres aña i mei i e lo kier wòrdu adorá komo dios. Lo bini un estatua grandi di dje riba e plenchi di tèmpel na Jerusalem, ku lo kuminsá papia tambe na un dado momento.

Lo bin un momento durante di e tribulashon ku bo por tuma e marka di e bestia. Un marka riba bo frenta o riba bo man drechi. Beibel ta yama e sifra di e marka aki 666. Si bo tuma e marka aki bo ta hasi bo mes parti di e reino di satanas, bo ta yama e rabia di Dios riba bo i e ora ei salbashon lo no ta posibel mas. Sin e marka bo no por kumpra ni bende, pues ta bai bira hopi difísil pa por sigui funshoná den e komunidad.

## Resúmen di Dios Su Huisio den e 7 añanan di Tribulashon.

Dor ku e kana di piká lo a yega na un punto ku el a yena, Dios lo ehekutá Su huisio riba e mundu. E desasternan lo bira mas intensivo den e 7 añanan aki, ku un klimax den e segundo 3,5 añanan, ku Beibel ta yama e Gran Tribulashon.

Durante e tres aña i mei aki e humanidat lo bira mas sin amor i mas violento. Kuminda lo bira mas skars. Un kuarto parti di humanidat lo muri a kousa di guera, hamber, plaga i bestianan feros. Lo bai tin un teremoto gigante ku lo kue henter e planeta. Montañanan i islanan lo move for di nan lugá, pidanan grandi di piedranan kósmiko lo kai riba tera. A kousa di esaki sunami i aktividatnan volkániko lo kuminsá. Kandela lo yobe riba tera di moda ku lo tin kandela tur kaminda. Bientunan lo wòrdu lagá lòs ku lo sker serunan i kibra barankanan na pida. Despues di e promé tres aña i mei aki, 60% di e poblashon di mundu lo ta na bida.

Despues di esaki lo sigui un serie nobo di huisio. Lo bai tin áwaseru di kandela, meteorit lo kai di moda ku un tersera parti di tur laman di mundu lo kambia den sanger. Lo bin un sunami masha grandi, di moda ku un tersera parti di tur barku lo kaba na nada, un tersera parti di tur fuente di awa lo wòrdu venená, i e solo, luna i streanan lo bira skur.

Un kapítulo den e buki di Revelashon ku ta duna bo kalafriu, ta papia di dalakochinan diabóliko ku lo tormentá hende na mundu pa lunanan largu di moda ku nan lo buska morto pero lo no por hañ’e. E demoñonan aki lo no hasi e hendenan ku bin na fe nada, pasobra Dios ta protehá nan.

Despues di esaki lo bini un serie nobo di huisio. 1. E hendenan ku tin e marka di e bestia lo haña tumornan maligno. 2. Laman lo kambia den sanger i tur bida den laman lo muri. 3. Riunan i fuentenan di awa tambe lo kambia den sanger. 4. Lo tin kalor ekstremo. 5. Lo tin skuridat total den e reino di e anti-kristu. 6. E riu Eufrates lo seka. 7. Lo bini un teremoto nunca bisto, e siudat Babilonia (posiblemente Roma, un parti grandi di e reino di e anti-kristu) lo kai for di otro den tres pida, algun otro siudat lo kai den otro i sierto serunan lo bo no por mira mas. Piedranan di hagel di mas o ménos 26 kilo lo kai for di shelu. Despues di e huisionan aki lo no por papia mas di un komunidad strukturá. Suministro di koriente, transporte públiko, bankonan etc. kasi lo no funshoná mas.

E anti-kristu lo prepará su mes na final di e 7 añanan aki ku un ehérsito grandi pa hasi guera kontra Israel. Lo bai tin un

teremoto grandi i Hesus lo bini bèk físikamente riba e seru di Oleifi na Jerusalem. E lo mata e anti-kristu ku e rosea di Su boka i e milenio (1000 aña) di e reino di pas ta kuminsá.

### **E reino di pas di 1000 aña**

Despues di shete aña di miseria lo bini 1000 aña di pas riba mundu, kaminda Hesu-Kristu lo dirigí e mundu for di Jerusalem. Lo bai tin kondishonnan paradísiko, bestianan ku ta kome karni lo kome yerba, e lamchi lo por biba huntu ku e leon. Na komienso di e temporada aki e kreyentenan ku a muri durante di e tribulashon lo lanta bèk pa reina huntu ku Hesus i Su iglesia. Señor Hesus lo huzga e pueblonan na komienso di e 1000 añanan aki, kaminda ku E, komo rei, lo kaba ku tur e enemigunan di Israel. E diabel lo wòrdu lagá lòs atrobe na final di e reino di pas i e lo purba sedusí hopi hende pa bringa kontra Jerusalem. E lo

pèrdè e bataya aki pasobra Señor Hesus lo trese un final na e sedukshon di diabel i lo tiré pa semper den e lago di kandela.

### **E eternidat**

Tur hende ku a yega di biba lo mester para dilanti di e trono di Dios un dia. Einan nos tur lo wòrdu huzgá pa loke nos a hasi, sea bon o malu. Lo bai tin dos destinashon eterno; shelu pa esnan ku a aseptá Kristu i fièrnu pa esnan ku a rechasá Kristu i a aktua kontra di nan konsenshi. Mi por imahiná ku e kosnan aki ta kai poko duru, pero mi kier pidi bo pa bo investigá nan. Dios ta un Dios bibu, pidiÉ pa E laga bo mira e bèrdat. PidiÉ pa E guia bo ora bo ta lesa Beibel. E ta laga hañ'É. Dios tabata stima bo kaba promé ku bo a nase i E kier un relashon ku bo. Dios lo haña horibel si bo no aseptá su salbashon i bo bai pèrdi pa eternidat. E kier pasa eternidat huntu ku bo, di moda ku lo bo ta felis pa semper.

## Konsehonan pa e 7 aña di tribulashon

### **Pidi Dios guia**

Dios ta skucha bo semper, si bo papia den bo mes o bo papia duru. Pone bo konfiansa den djE. E kier yuda bo den e tempu aki i duna bo forsa. Bo mester djis pidiÉ.

### **Lesá Beibel**

Dios ta papia pa medio di Beibel, esaki no ta simplemente un buki, pero e "bukibibu". Pa medio di esaki Dios kier guia bo i siña bo atraves di Su Spiritu Santu. Den e último buki di Beibel, Revelashon, tin hopi kos skirbí tokante tribulashon.

### **Konta otronan tokante Dios Su plan di salbashon**

Dios no kier pa niun hende bai pèrdi, pero pa tur hende wòrdu salvá. E kier uza bo pa konta otro

hende ku nan por wòrdu salvá dor di kere den Señor Hesus.

### **No tuma e marka di e bestia**

Si bo tuma e marka di e bestia, bo ta skohe pa e reino di satanas. Hesus ta bisa "I no tene miedu di esnan ku ta mata e kurpa, ma ku no por mata e alma; ma mas bien tene miedu di Esun ku por destruí tantu alma komo kurpa den fièrnu"(MATEO 10:28). Esaki no ta Dios Su boluntad, pero ku esaki Hesus kier mustra ku tin hopi mas kos na peliger ku solamente nos bida presente. Bo por haña mas tokante e marka aki den e promé parti di e Tribulashon.

### **Sea konsistente i mantené bo bista riba eternidat**

Den Beibel ta trata hopi biaha

tokante perseveransia. E bida di un kristian hopi biaha no ta fásil, hopi kristian a sufri a kousa di nan kreensia. Pero dor di keda konfia riba Dios i obedes'É nos por vense huntu kunÉ. Komo yu di Dios no ta eksistí sufrimentu pornada, E sufrimentu riba e mundu aki lo sòru pa mas gloria den e mundu benidero.

Den Romanonan 8:17, 18 ta pará: i si nos ta yu, nos ta erederu tambe, erederu di Dios i ko-ederu ku Cristo, si di bèrdat nos ta sufri huntu kunE, pa nos wòrdu glorifiká tambe huntu kunE. Pasobra mi ta konsiderá ku e sufrimentunan di e tempu presente aki no ta digno di wòrdu kompará ku e gloria ku lo wòrdu revelá na nos.